

Crusada Emmastraat y Caya Betico Croes ta habri pa trafico

ORANJESTAD – Durante un encuentro cu prensa, prome minister Mike Eman a anuncia cu e crusada Emmastraat y Caya Betico Croes, ta habri.

El a sigui splica cu e crusada di Emmastraat y Caya Betico Croes ta un di e camindanan principal pa por yega di banda panort di Caya Grandi pa por yega na e parti pazuid. Debi na e trabaonan cu tabata andando durante bastanta tempo y tambe e instalacionnan cu mester a wordo instala pa por garantiza cu e trafico di e tram por tabata segura, pa ora e autonan yega, tin un forma automatico cu e trafico ta wordo wanta un rato, pa asina por garantiza cu e tram por crusa tur seguridad y e autonan tambe tin tur e informacion delanta cu tin e trafico di tram ta yegando den un crusada.

Alivio grandi

Gobierno ta satisfecho cu e instalacion, tanto tecnologico di locual mester bay dirigi e trafico di tram y automobilistanan y tambe ta contento cu Emmastraat ta bay habri. E trafico den centro di ciudad, debi na tur e trabaonan y e cantidad di autonan, ta hopi pega. Sin duda cu e apertura di Emmastraat lo bay logra un alivio hopi grandi y ta contento cu esey.

Balor simbolico

E apertura di Emmastraat tambe tin un balor simbolico grandi pasobra e ta nifica tambe cu e avance den e proyecto di renobacion di centro di ciudad a yega un etapa nobo atrobe y un etapa hopi significativo. Cu e parti di Oranjestad, e parti di centro di ciudad, cu ta acopla na Rancho, ta forma parti di e trabaonan cu mester bay sigui haci pa e renobacion di centro di ciudad y e trabaonan cu kier sigui haci tambe ta tur e cayanan cu ta core adicional (zijstraten) di caya grandi, cu tambe mester wordo drecha.

Cayanan adicional

Gobierno no kier a haci trabaonan grandi ainda den e cayanan aki, pasobra cu Emmastraat cera y zijstraat cera, e trafico den centro di ciudad lo a bira hopi dificil. Cu Emmastraat habri ta haya espacio pa cuminsa di biaha cu algun di e cayanan banda di caya grandi cu ta importante tambe pa nan wordo renoba pa nan tambe cuadra den e aspecto di e centro di ciudad renoba, esteticamente, pero tambe organisatoriamente. E mandatario a expresa di ta contento cu por a yega na e punto aki.

Un desaroyo bunita

Centro di ciudad ta birando



tur dia mas bunita. Diabierna tabata na un tienda cu a habri nobo den caya. Ta mira den Emmastraat diferente edificio historico na e momentonan aki ta wordo renoba. Directamente na inicio di Emmastraat, edificio directamente despues di e edificio di Voogdijraad cu ta bay wordo renoba hunto cu e organizacion nobo “Renobacion Aruba NV”, ta algo cu ta bay sosode den algun siman cu ta bay wordo formalisa. Asina e aspectonan cu a yega na Caya Grandi, cu e renobacion y entusiasmo y optimismo, poco poco ta mira cu den e resto di Centro di ciudad, esaki tambe tin e efectonan cu tin un estimulo nobo pa inverti y pa kere den e futuro di centro di ciudad.

Trabaonan grandi pa polis

Pa Cuerpo Policial, e traba-

onan cu nan ta haciendo den e area aki ta crucial pa por tin un sistema di trafico nobo cu un elemento nobo, cu ta e tram. Awor tin dos tram, despues lo bay tin 4. Tur esaki ta pone un presion adicional riba Cuerpo Policial.

Informacion di trafico

Tin un campaña di informacion cu a inicia ayera, pa tur automobilista ta na altura di e infraestructura di seguridad pa tin pa evita cualkier choke, cualkier situacion menos agradabel entre e autonan y e tram of entre peatonan cu e tram of autonan. A concentra riba un sistema di tecnologia hopi avansa. Ora cu tram ta yegando, boom ta baha, autonan ta para, luz cora ta cende. Tur esakinan ta cosnan nobo cu automobilistanan mester tene cuenta cun’e. □